

ಯಾಕೊಬನು ಬರೆದ ಪತ್ರಿಕೆ ಯಾಕೊಬಾನಿ ಲಿವ್‌ಲ್ಯಾಲ ಪತ್ರ ವಳಕ್

ಯಾಕೊಬಾನಿ ಲಿವ್‌ಲ್ಯಾಲ ಪತ್ರ ಯಾಕೊಬ್ ಮನ್ವುನ್ ಹಾಕಟ್ಟಾಲ್ಯಾ ಕುನಿ ಯಕಾನಿ ಲಿವ್‌ಲ್ಯಾ ಮುಬ್ ಕರುನ್ ಹ್ಯೊ ಯೇಸುಚಾ ಬಾಹು ಯಾಕೊಬ್ ಆಸಲ್, ತ್ಯೊ ಸುವಾರ್ತಾಚೆ ಸಭೆಚಾ ಫುಡಾರಿ ಭಾಲ್ಯಾಲ್ಯಾ ಯೇರುಸಲೆಮಿಚೆ ಮಹಾ ಸಭೆತ್ ಆಸ್‌ಲ್ಯಾಲಾ ಭಾಲ್ಯಾಅಪೊಸ್ತಲ್ 15:13 ಅಪೊಸ್ತಲ್ ಪೌಲ್ ಸಾಹಿತ್ ಗಲಾತ್ಯಾನಾ ಲಿವ್‌ಲ್ಯಾಲ್ಯಾ ಪತ್ರ್‌ತ್ ಗಲಾಡ್ಲ 2:9 ಹ್ಯೆಲಾ ಯೊಕ್ ಸಭೆಚಾ ಖಾಂಬ್ ಮನ್ವುನ್ ಹಾಕಟೊ. ವಿದ್ವಾಂಸ್ ಯಾಕೊಬಾನಿ ಲಿವ್‌ಲ್ಯಾಲ್ಯಾ ಪತ್ರ್‌ತ್ ಕ್ರಿಸ್ತ್ ಜಲಾಮ್‌ಲ್ಯಾ ನಂತರ್ ಮುಬ್ ಕರುನ್ 50 ವರ್ಸಾತ್ ಲಿವ್‌ಲ್ಯಾ ಮನ್ವುನ್ ಇಸ್ವಾಸ್ ಥೆವ್‌ತ್ಯಾತ. ಯಾಹೊಕ್ ಯೇರುಸಲೆಮಿಚೆ ಸಭೆತ್ ಯೊಕ್ ಫುಡಾರಿ ಭಾಲ್ಲ್ಯಾ.

ಮುಬ್ ಕರುನ್ ಹ್ಯೊ ತಿಥ ಜೀವ್ವಾಕರ್ತಾನಾ ಹ್ಯ ಪತ್ರ ಲಿವ್ಲ ಆಸಲ್ ಯಾಕೊಬಾನಿ ಹ್ಯ ಪತ್ರ ದುಸ್ರೆ ದುಸ್ರೆ ದೆಶೆತ್ ಪಗಳುನ್ ಗೆಲ್ಯಾಲ್ಯಾ ಬಾರಾ ಕುಳಾಂಚಾ ಉದ್ದೆಶಾನಿ ಲಿವ್‌ಲ್ಯಾ 1:1 ಯಾಕೊಬಾಚಾ ಪತ್ರ್‌ತ್ ಆಸ್‌ಲ್ಯಾಲ ಸಿಕಿವ್ವ ಸಗ್ಳೆ ಕ್ರಿಸ್ತಾಚಾ ಇಸ್ವಾಸಿನಾ ಪೈಲ್ಯಾನಿಸ್ ಫನ್ “ಬಾರಾ ಆಳ್” ಮಂಥ್ಯಾಲಾ ಸಬ್ದಾಚಾ ಉಪಯೋಗ್ ಯಾಕೊಬಾನಿ ಶಾರ್ಕಾ ಯೆಹುದಿ ಕ್ರಿಸ್ತಾಚಾ ಇಸ್ವಾಸಿನಾ ಲಿವ್ಲೊ ಮನ್ವುನ್ ದಾವುನ್ ದೆತ. ಕಾ ಮಂಜೆ ಹ್ಯ ಪುಸ್ತಕ್ ಮುಬ್ ವಾಚಿವ್‌ತ್ಯಾಲ್ಯಾನಾ ಪೊಚಾಯಾ ವ್ಹಯಿ ಜಾಲ್ಲ್ಯಾ ಹ್ಯಾತ್ ಮುಬ್ ಗುಶ್ಟಿ ಹಾತ್ತಾ. ಯಾಕೊಬಾನಿ ಇಸ್ವಾಸಾಚಾ ಆನಿ ಕಾಮಾಚೆ ಮದ್ಲಿ ಅಸ್‌ಲ್ಯಾಲಾ ಸಂಬಂದಾಚೆ ಗುಶ್ಟಿತ್ ಮುಬ್ ದ್ಯಾನ್ ದೆತೊ. ಖರಾ ಇಸ್ವಾಸ್ ಕಾಮಾನಿ ದಾವುನ್ ದೆತೊ 2:17 ತ್ಯನಿ ಸಾವ್ಕರ್ಕಿ ಲೊಕಾನಾ ಆಡ್ವಚಿ ಹುಶಾರ್ಕಿ ದೆತೊ. 2:1-4 ಆನಿ ಆಮಿ

ಸಾಂಗ್ತ್ಯಾಲ್ಯಾಚೆ ಗುಶ್ಟಿತ್ ಹುಶಾರ್ಕಿ ರಾಹ್ಯಾವ್ವಯಿ ಮನ್ವುನ್ ಸಾಂಗುನ್ ದೆತೊ 3:1-12

ಪಿರಿಕೆ

1. ಯಾಕೊಬ್ ವಾಚಿವ್ತ್ಯಾಲ್ಯಾನ್ ವಂದನ್ ಕರ್ತೊ 1:1
2. ನಂತರ್ ತ್ಯೊ ಕಷ್ಟ ಯತಾನ್ ಸುಸ್ವುನ್ ಗಿಹ್ಯಾಲಾ ಕ್ರಿಸ್ತಾಚಾ ಇಸ್ವಾಸಿನಾ ಉಮೇದ್ ದೆತೊ 1:2-27
3. ನಂತರ್ ತ್ಯೊ ಕಾಮಾನಿ ಇಸ್ವಾಸ್ ದಾವಾಚಾ ಕೃಪ್ತಾವ್ವಯಿ ಜಾಲ್ಯಾ ಮನ್ವುನ್ ಸಾಂಗ್ತೊ 2:1-26
4. ಹ್ಯಚೆ ನಂತರ್ ಬೊಲ್ಯಾ ಕೃಪ್ತಾಚಾ ಬಳಾಚಾ ಆಸ್ತ್ಯಾತಾ ಮನ್ವಾಚೆ ಸಾಂಗ್ತೊ 3:12
5. ತವಾ ಯಾಕೊಬಾ ದುನೆಚೆ ಗಿನ್ಯಾನ್ ದೆವಾಚಾ ಗಿನ್ಯಾನ್ಯಾಚಿ ಕೃಪ್ತಾ ಯಗ್ನ ಹಾ ಮನ್ವಾಚೆ ಫುಡುನ್ ಸಾಂಗ್ತೊ 3:13—4:10
6. ನಂತರ್ ತ್ಯೊ ಬಡಾಯಿ ಕರ್ತ್ಯಾಲ್ಯಾಂಚೆ ಆಡ್ಲ ವಾಚಿವ್ತ್ಯಾಲ್ಯಾನಾ ಹುಶಾರ್ಕಿ ದೆತೊ 4:11—5:6
7. ವಚನಾತ್ ಥೊಡ್ಯಾ ಬ್ಯಾರ್ಕಾ ಸುಚನಾ ದಿಯಿತ್ ಪತ್ರ ಸುಪಿವ್ತೊ 5:7-20

¹ ದೇವಾಲಾಬಿ ಪ್ರಭು ಜಾಲ್ಯಾಲ್ಯಾ ಯೇಸು ಕ್ರಿಸ್ತಾಲಾಬಿ ಸೇವಕ್ ಜಾಲ್ಯಾಲಾ ಯಾಕೊಬ್ ದುಸರೆ ದೇಶೆತ್ ಪಗಾಳ್ಕಾಲ್ಯಾ ಇಸ್ರಾಯಲಾಂಚಾ ಬಾರಾ ಕುಳಾತ್ಲ್ಯಾನಾ ಲಿವ್ಲ್ಯಾಲ ಕ್ಯಾಮಂಜೆ, ತುಮಾನಾ ಬರ ವ್ಹಪುನಿ.

ಇಸ್ವಾಸ್ ಆನಿ ಗಿನ್ಯಾನ್

² ಮಾಜಾ ಬಂದ್ತಿ ಬಾವ್ತಾನು, ತುಮಿ ನಾನಾ ತರಚೆ ತರಾಸ್ ಕ್ಯಾಡ್ತಾರ್ ತ್ಯಾ ನಿಸ್ತ ಸಂತೊಶಾಚೆ ಮನ್ವುನ್ ಸಮಜಾ.

³ ಕಾ ಮಂಜೆ ತುಮ್ಮಾ ಇಸ್ವಾಸಾಲಾ ವ್ಹತ್ಯಾಲಿ ಪರೀಕ್ಷೆ ತುಮಾನಾ ಸಮಾದಾನ್ ಕರ್ತಿ ಮನ್ವುನ್ ತುಮಾನಾ ಸಮಜುನಿ.

⁴ ತ್ಯೊ ಸಮಾದಾನ್ ಪುರಾ ತುಮ್ಮಿಪ ದಿಸುನಿ, ತವಾ ತುಮಿ ಸರ್ವ್ಯಾ ಗುನಾಚೆ, ನಿರ್ದೋಸಿ, ಕಶಾತ್ ಕಮ್ಮಿ ನಸಲ್ಯಾಲಿ ವ್ಹನಾರ್.

5 ಫನ್ ತುಮ್ಮಿಪ ಕುನಾಪತರಿ ಗಿನ್ಯಾನ್ ಕಮ್ಮಿ ಆಸ್ಲತ ತ್ಯೊ ದೇವಾಪ ಮಾಗುನಿ, ತ್ಯ ತ್ಯಲಾ ಗಾವ್ವಾರ್.

ಕಾಮಂಜಿ ದೇವ್ ದಪಕ್ಕಾವಾಚೆ ಆಂದಿ ಸಗ್ಳ್ಯಾನಾ ಪುಕಟ್ ದೆನಾರಾ ಜಾಲ್ಯಾ.

6 ಫನ್ ದೇವಾಪ ಮಾಗ್ನಾರ್ಯಾನಿ ಥೊಡಾಬಿ ಸಂಸೆವ್ ನಸ್ಥಾನಾ ಇಸ್ವಾಸಾನಿ ಮಾಗುನಿ. ಸಂಸೆವ್ ಕರ್ನಾರಾ ವಾರ್ಯಾನಿ ಆದ್ಕುನ್ ಸಮಂದೊರಾಚಾ ಲಾಟಾಚೆಗತ್ ಹಿಕ್ಡ ತಿಕ್ಡ ಪಿರತ್ಯೊ.

7 ತ್ಯೊ ಮಾನುಸ್ ಆಪ್ಲು ಪ್ರಭುಪ್ಪಿ ಕಾಯ್ತರಿ ಗಾವ್ವಾರ್ ಮನ್ವುನ್ ಯವ್‌ಜುನಾಹಿ.

8 ಕಾಮಂಜಿ ತ್ಯೊ ದೊನ್ ಮನಾಚಾ, ತ್ಯಚಿ ಚಾಲ್ತುಕ್ ಶಾರ್ಕಿನಾಹಿ.

ಗರಿಬ್ ಆನಿ ಸಾವ್ವೊರ

9 ಗರಿಬ್ ಆಸ್‌ಲ್ಯಾಲಾ ಬಾಹು ಆಪ್ಲು ಸಾವ್ವೊರ್ ಜಾಲ್ಲ್ಯೊ ಮನ್ವುನ್ ಸಂತೊಸ್ ವ್ಹವುನಿ.

10 ಸಾವ್ವೊರ್ ಆಸ್ಸಾರಾ ಆಪ್ಲು ಗರಿಬ್ ಜಾಲ್ಲ್ಯೊ ಮನ್ವುನ್ ಸಂತೊಸ್ ವ್ಹವುನಿ; ಕಾಮಂಜಿ ಸಾವ್ವೊರ್ ಗವಾಚಾ ಪುಲಾಚೆಗತ್ ನಾಹಿನಪಟ್ ವ್ಹನಾರ್.

11 ದಿಸ್ ಉಗಾವಲ್ಯಾ ನಂತರ್ ಜಳ್‌ತ್ಯಾಲ್ಯಾ ಉನಾನಿ ಆಳಿ ವಾಳುನ್, ಪುಲ್ಲ ಜಡುನ್ ತ್ಯಚಿ ಸೊಬಾ ನಾಹಿವ್ಹತಿ; ತಸಾಸ್ ಸಾವ್ವೊರ್ ಆಪ್‌ಲ್ಯಾ ಯತ್ನಾತ್ ಪಡುನ್ ನಾಸ್ ವ್ಹವುನ್ ಜಾನಾರ್.

12 ಪರಿಕ್ಷೆ ಸುಸುನ್ ಗೆನ್ವಾರಾ ಬರಾ. ತ್ಯೊ ಪರಿಕ್ಷೆತ್ ಘಟ್ ರಾಹುನ್ ಪ್ರಭು ಆಪ್ಲಿ ಮಾಯಾ ಕರ್ತ್ಯಾಲ್ಯಾನಾ ಸಬ್ದ ದಿಲ್ಯಾಸಾರಾ ಶಾಶ್ವತ್ ಜೀವಾಚ್ ಕಿರಿಟ್ ಗೆನ್ವಾರ್.

ಪರಿಕ್ಯಾ ಆನಿ ತರಾಸ್

13 ಕೊನ್ತರಿ ಪರಿಕ್ಷೆತ್ ಪಡ್‌ಲ್ಯಾ ನಂತರ್ ಹೀ ಪರಿಕ್ಷೆ ಆಪ್‌ಲ್ಯಾಲಾ ದೇವಾನಿ ದಿಲಿ ಮನ್ವುನ್ ಸಾಂಗುನಾಹಿ. ಕಾಮಂಜಿ ದೇವ್ ಬುರ್ಶಾನಿ ಪರಿಕ್ಷೆ ದಿಯಿತ್ಲಾಹಿ. ಆನಿ ತ್ಯೊ ಕುನಾಲಾಸ್ ಪರಿಕ್ಷೆ ಕರಿತ್ಲಾಹಿ.

14 ಫನ್ ಪರ್ತೆಕ್ ಯೊಕ್ ಬುರ್ಶೆ ಆಶೆತ್ ಗಾಹುನ್ ಖುಳಾ ವ್ಹಪುನ್ ಪರಿಕೈತ್ ಗಾವೊ.

15 ತ್ಯಾ ನಂತರ್ ಬುರ್ಶೆ ಆಶಾ ಗರ್ವಾರ್ ರಾಹುನ್ ಪಾಪ್ ಭಲಾಮ್ತು. ಪಾಪ್ ಪುರ ವಾಡುನ್ ಮರಾನ್ ಆನ್ತ.

16 ಮಾಜಾ ಮಾಯಾಚಾ ಬನ್ವಿ ಬಾವ್ತಾನು, ಪಸುನಕೊಸಾ.

17 ಸಗ್ಳಿ ಚಾಂಗ್ಲಿ ವರ ಆನಿ ಉತ್ತಮ್ ವರ್ದಾನ ವೈನಿ ಮಂಜೆ ದೇವಾಪ್ಪಿ ಯತ್ಯಾತ ತ್ಯನಿ ಆಬ್ಕಾಚ್ ದಿವ ಉತ್ಪನ್ ಕೆಲ, ತ್ಯೊ ಬಧಾಲ್ನಾರ್ ನಾಹಿ. ಆನಿ ಕಚಾಸ್ ಕಾರ್ನಾಲಾ ಬದ್ಲಾವನೆಚಿ ಸಾವುಟ್ ಸಾಹಿತ್ ತ್ಯಚಿವ ಪಡತ್ ನಾಹಿ.

18 ದೇವಾನಿ ಆಪಲ್ಯಾ ಮನಾಸಾರ ಖರ್ಚ್ಯಾ ವಾಕ್ಯಾಸ್ ಲಾಗುನ್ ಜೀವ್ ದಿಲಾ ಮನ್ವುನ್ ಆಮಿ ತ್ಯಚೆ ಸರ್ವೆ ಉತ್ಪತ್ತಿತ್ ಪೈಲ ಫಳ್ ಭಾಲ್ಯಾವ್.

ಐಕಾಚ್ ಆನಿ ಕರಾಚ್

19 ಮಾಜಾ ಮಾಯಾಚಾ ಬನ್ವಿ ಬಾವ್ತಾನು, ತುಮಿ ಹ್ಯ ಶಾರ್ಕ್ ಸಮಜುನ್ ಗೆವ್ತಾ ಪರ್ತೆಕ್ ಯೊಕ್ ಐಕಾಯಾ ಚುರುಕ್ ರಾಹುನಿ, ಬೊಲ್ನ್ಯಾತ್ ಆನಿ ರಾಗಾತ್ ಥಂಡ್ಲನಾನಿ, ಸಮಾದಾನಾನಿ ರಾಹುನಿ.

20 ಕಾಮಂಜೆ ಮಾನ್ಸಾಲಾ ರಾಗ್ ಆಲಾಕಿ ದೇವ್ ಮಂತ್ಯಾಲ್ಯಾ ನೀಯತಿಚ್ ಕಾಮ್ ಕರಾಯಾ ವ್ಹಯಿತ್ನಾಹಿ.

21 ಮನ್ವುನ್ ಸಗ್ಳೆ ನೀಚ್ಫನ್, ಸಗ್ಳೆ ಬುರ್ಸೆಫನ್ ಕಾಡುನ್ ಮನಾತ್ ಆಸ್ಲಾಲ್ಯಾ ದೇವಾಚಾ ವಾಕ್ಯಾ ಮಾಯೇನಿ ಗೆವ್ತಾ ತ್ಯನಾ ತುಮ್ಚಾ ಜೀವ್ ರಾಕಾಯಾವ್ತೊ.

22 ದೇವಾಚಾ ವಾಕ್ಯಾಸಾರಿ ಚಾಲಾ, ತ್ಯನಿಸ್ಥೆ ಐಕ್ವಾರಿ ತ್ಯೆವ್ಡಿತ್ ವ್ಹಪುನ್ ತುಮಾನಾಸ್ ತುಮಿ ಪಸ್ವನ್ನಿಹುನಕೊಸಾ.

23 ಕೊನ್ತರಿ ವಾಕ್ಯಾ ಐಕುನ್ ತ್ಯಚಿಗತ್ ಚಾಲ್ಯಾನಸ್ಲಾವ ತ್ಯೊ ಆರ್ಶಾತ್ ಆಪ್ಲೆ ತ್ವಾಂಡ್ ಬಗ್ಲಾಲ್ಯಾ ಮಾನಸಾಚಿಗತ್ ರಾನ್ದಾರ್.

24 ಕಾಮಂಜೆ ಹ್ಯೊ ಆಪಲ್ಯಾಲಾ ಆಪನುಸ್ ಬಗುನ್ ನಂತರ್ ಆಪ್ಲು ಆಸಾಹಾ ಮನ್ವುನ್ ತವಾಸ್ ಇಸಾರ್ಲಾರ್.

25 ಫನ್ ಸುಟ್ಟುಕ್ ದೇನಾರ ಪುರ ಧರ್ಮಶಾಸ್ತ್ರಾರ್ ದ್ಯಾನ್ ದಿವುನ್ ವಾಚ್ವುನ್, ಇಚಾರ್ ಕರುನ್ ತ್ಯಚೆಗತ್ ಘಾಲ್ಯಾರಾ ವಾಕ್ಯಾ ಏಕುನ್ ಇಸರುನ್ ಭಾಯಾಚೆ ಆಂದಿ ತ್ಯಚೆಗತ್ ಘಾಲತ್ ಆಪ್ಲೆ ಘಾಲ್ತುಕಿನಿ, ಕಾಮಾನಿ ಆಶೀರ್ವಾದ್ ಗೆನ್ನಾರ್.

26 ಆಪ್ಲ್ಯಾಲಾ ಬಘತ್ ಮಂಥ್ಯಾಲಾ ಕೊನ್ತರಿ ಆಪ್ಲಿ ಜೀಬ್ ಆಪ್ಲ್ಯಾ ತಾಬ್ಯಾತ್ ದರಾಡ್ತಾಚೆ ಆಂದಿ ಆಪಲ್ಯಾ ಮನಾಲಾ ಫಸಿವತ್ಯಾಲಾ ಭಾಲ್ಯಾವ ತ್ಯಚಿ ಬಕ್ತಿ ಫುಕಟ್ ಜಾಲೆ.

27 ತರಾಸಾತ್ ಆಸ್ಲ್ಯಾಲ್ಯಾ ಗತಿ ನಸಲ್ಯಾಲ್ಯಾನಾ, ವಿದ್ವೆಂಚಿ ಕ್ಯಾಳ್ಜಿಕರಾ ಆಸ್ಲ್ಯಾಲಾ ಹೆ ದುನೆಚಾ ದೊಸ್ ಲಾಗುನಾಹಿ ಆಸಾ ಆಪ್ಲ್ಯಾಲಾ ಆಪ್ಣು ರಾಕಾಚೆ ಬಾ ಭಾಲ್ಯಾಲ್ಯಾದೇವಾಚೆ ಮೊರಾಚಾಂಗ್ಲ, ನಿರ್ಮಳ್ ಭಾಲ್ಯಾಲಿ ಬಕ್ತಿ.

2

ಬೇದ್ ಬಾವಾಚೆ ಗುಶ್ಟಿತ್ ಹುಶಾರ್ಕಿ

1 ಮಾಜಾ ಬನ್ವಿ ಬಾವ್ವಾನು, ಮೈಮೆಚಾ ಆಮ್‌ಚಾ ಪ್ರಭು ಯೇಸು ಕ್ರಿಸ್ತಾವ ಇಸ್ವಾಸ್ ಥೆವೆಲ್ಯಾಲಿ ತುಮಿ ಬೇದ್ ಬಾವ್ ಕರ್ತಾಲಿ ರಾಹುನಾಹಿ.

2 ಕಸ ಮಂಜೆ ಯೊಕ್ ಮಾನುಸ್ ಸೊನ್ಯಾಚಾ ಆಂಕ್‌ಟ್ಯಾ ಆನಿ ಘಾಂಗ್ಲ ಕಪ್ಪ ಗಾಲುನ್ ತುಮ್ಚೆ ಮಂಡಳಿತ್ ಆಲಾಕಿ ಆನಿ ಯೊಕ್ ಗರಿಬ್ ಮಾನುಸ್ ಬುರ್ಸ ಕಪ್ಪ ಗಾಲುನ್ ಆಲಾಕಿ,

3 ತುಮಿ ಘಾಂಗ್ಲ ಕಪ್ಪ ಗಾಲುನ್ ಆಲ್ಯಾಲ್ಯಾಲಾ ಮರೆದಿನಿ ಬಗುನ್ ತ್ಯಲಾ ತುಮಿ ಮರೆದಿಚೆ ಕುರ್ಚಿವ ಬಸಾ ಮನ್ವುನ್, ತ್ಯಾ ಗರಿಬಾಲಾ ತು ತಿತ್ಲ ಉಬಾರ್ನ್ ಹಾಕಿತ ಹಿತ ಪಾಯಾಪಲ್ಯಾ ಬಿಸನ್ಯಾಪ ಬಸ್ ಮನ್ವುನ್ ಸಾಂಗಲ್ಯಾವ,

4 ತುಮಿ ತುಮ್ಮಾ ತುಮ್ಮಾತ್ ಬೇದ್ ಬಾವ್ ಕರ್ನಾರಿ ವ್ಹವುನ್, ಬುರ್ಶಾ ಇಚಾರಾಚೆಗತ್ ಘಾಲಾಯಾ ನಿರ್ಧಾರ್ ಕರ್ತಾಸಾ ನವ್ಲ ಕ್ಯಾ?

5 ಮಾಜೆ ಮಾಯೆಚಾ ಬನ್ವಿ ಬಾವ್ವಾನು, ಏಕಾ ದೇವ್ ಹೆ ದುನೆತ್ ಗರಿಬಾನಾ ಇಸ್ವಾಸಾತ್ ಸಾವ್ಕಾರ್ ಕರುನ್ ಆಪ್ಲಿ ಮಾಯಾ ಕರ್ತಾಲ್ಯಾನಾ

ಆಪ್ತು ಸಬ್ಬ ದಿಲ್ಯಾಲ್ಯಾ ರಾಜಾತ್ ವಾರಸ್ತಾರ್ ರಾಹ್ಯಾವ್ವಯಿ ಮನ್ವುನ್ ನಿವಡ್ಲನಾಹಿ ಕ್ಯಾ?

6 ಫನ್ ತುಮಿ ಗರಿಬಾನಾ ಅವ್ಮಾನ್ ಕೆಲ್ಯಾಸಾ. ತುಮಾನಾ ದರುನ್ ನ್ಯಾಯಿ ಕರ್ತ್ಯಾತ ತಿತ್ಲ ವಡುನ್ ನೆನಾರ ಸಾವ್ಕಾರ್ ನವ್ವತ ಕ್ಯಾ?

7 ತುಮಿ ಹಾಕಟ್ಲ್ಯಾಲ ತ್ಯಾ ಚಾಂಗಲ್ಯಾ ನಾವಾಚಿ ನಿಂದಾ ಕರ್ನಾರ ತೇಸ್ ನವ್ವತ ಕ್ಯಾ?

8 ಫನ್ ಧರ್ಮಶಾಸ್ತ್ರಾರಾ ಶಾರ್ಕ, “ತುಜಾ ಸೆಭಾರ್ಚ್ಯಾಚಿ ತುಜಿಗತುಸ್ ಮಾಯಾ ಕರಾಯಾವ್ವಯಿ” ಮನ್ವುನ್ ರಾಜಾಚಾ ಹುಕುಮ್ ಫಾರಿಕ್ ಕೆಲ್ಯಾವ, ತುಮಿ ಬರ ತ್ಯ ಕರ್ತ್ಯಾಲಿ.

9 ಫನ್ ಯೆಕ ಯೆಳಿ ತ್ಯ ಸುಡುನ್ ತುಮಿ ಬೇದ್ ಬಾವ್ ಕರ್ನಾರಿ ಆಸ್ಲಾಸಾತ ಪಾಪ್ ಕರುನ್ ಗುನದಾರ್ ಮನ್ವುನ್ ಧರ್ಮಶಾಸ್ತ್ರಾರಾಸಾರಿ ತೀರ್ಮಾನ್ ವ್ಹನಾರ್.

10 ಕಾ ಮಂಜೆ ಕುನಿತರಿ ಧರ್ಮಶಾಸ್ತ್ರಾರಾಚೆಗತ್ ಚಾಲುನ್ ತ್ಯಾತ್ಲೆ ಯಕಸ್ ಗುಸ್ಪಿತ್ ಚುಕಲ್ಯಾವ ತಸ್ಲ ಸಗ್ಳ್ಯಾ ಗುಸ್ಪಿತ್ಲಿ ಗುನ್ನದಾರ್ ವ್ಹತ್ಯಾತ.

11 ಕಾ ಮಂಜೆ ವ್ಯಬಿಚಾರ್ ಕರುನಾಹಿ ಮನ್ವುನ್ ಸಾಂಗ್ಲ್ಯಾಲ್ಯಾನಿಸ್ ಮಾನ್ಸಾಚಾ ಖುನ್ ಕರುನಾಹಿ ಮನ್ವುನ್ ಸಾಂಗ್ಲ ತ್ಯಾ ಕಾರ್ನಾನಿ ತು ವ್ಯಬಿಚಾರ್ ಕೇಲಾನಾಹಿತರಿ ಮಾನ್ಸಾಚಾ ಖುನ್ ಕೆಲ್ಯಾವ ಧರ್ಮಶಾಸ್ತ್ರಾರ್ ವಲ್ಯಾಂಡಲ್ಯಾಲಾ ವ್ಹತ್ಲೊ.

12 ತುಮಿ ಸುಟ್ನುಕ್ ಆಂತ್ಯಾಲ್ಯಾ ಧರ್ಮಶಾಸ್ತ್ರಾರಾ ಶಾರ್ಕ ತೀರ್ಪ ಗೆತಲ್ಯಾಲ್ಯಾನಾ ತಸಿಸ್ ಬೊಲಾ ಆನಿ ವಿಧೆಯ್ ವ್ಹವಾ.

13 ತುಮಿ ದುಸರ್ನ್ಯಾನಾ ಕರುನಾ ದ್ಯಾವ್ತ್ಯಾಲಿ ರಾಹ್ಯಾ ವ್ಹಯಿಸಾ ನಾಹಿತ ತುಮಾನಾ ದೆವ್ ನ್ಯಾಯಿ ತೀರ್ಮಾನ್ ಕರ್ತ್ಯಾಲ್ಯಾ ಯೆಳಾತ್ ಕರುನಾ ದಾವಿತ್ ನಾಯಿ. ಕರುನಾ ದ್ಯಾವ್ತ್ಯಾಲಾ ಮಾನುಸ್ ದೇವ್ ನ್ಯಾಯಿ ತೀರ್ಮಾನ್ ಕರ್ತ್ಯಾಲ್ಯಾ ಯೆಳಾತ್ ತ್ಯೊ ಜಿತ್ಲೊ.

ಇಸ್ತಾನ್ ಆನಿ ಕಾಮ್

14 ಮಾಜಾ ಬನ್ನಿ ಬಾವ್ವಾನು, ಯಕಾನಿ ಆಪ್‌ಲ್ಯಾಲಾ ಇಸ್ವಾಸ್ ಹಾ ಮನ್ವುನ್ ಸಾಂಗುನ್ ತ್ಯಚಿಗತ್ ಚಾಲ್ಲ್ಯಾ ಕಾಮ ನಸ್‌ಲ್ಯಾಲಾ ಜಾಲಾತ ಉಪೆಗ್ ಕ್ಯಾ? ತಸ್ಲಾ ಇಸ್ವಾಸ್ ತ್ಯಲಾ ರ್ಯಾಕ್ವಾರ್ ಕ್ಯಾ?

15 ತುಮ್ಚಾತ್‌ಲ್ಯಾ ಯಕಾ ಬಾವ್ವಾಲಾ ನಾಹಿತ ಯಕ ಬನ್ನಿಲಾ ಗಾಲ್ವಾಯಾ ಕಪ್ಪ ನಾಹಿತ ತ್ಯಾ ದಿಸಾಚ್ ಜೇವಾನ್ ವ್ಹಯಿ ಜಾಲತ,

16 ತುಮ್ಚಾತ್ಲಾ ಯೊಕ್ ತ್ಯನಾ ಶರೀರಾಲಾ ವ್ಹಯಿ ಜಾಲ್ಯಾಲ ಪುರ್ನ್ ಕರಾಚಿ ಆಂದಿ ಸಮಾದಾನಾನಿ ಜಾವಾ, ತಾಪತ್ ಬಸಾ, ಪ್ವಾಟ್ ಬರ್‌ವ್ನ್ ಖಾವಾ ಮನ್ವುನ್ ಸಾಂಗಲ್ಯಾವ ಉಪೆಗ್ ಕ್ಯಾ?

17 ತಸಸ್ ಕಾಮಾಲಾ ನಸ್‌ಲ್ಯಾಲಾ ಇಸ್ವಾಸ್ ಮೆಲ್ಯಾಲಾ ಜಾಲ್ಯಾ.

18 ತರಿಬಿ ಯೊಕ್; ತುಲಾ ಇಸ್ವಾಸ್ ಹಾ ಆನಿ ಮನಾ ಕಾಮ ಹಾತ್ತ ತು ಕಾಮ್ ನಸ್ಥಾನಾ ತುಜಾ ಇಸ್ವಾಸ್ ಮನಾ ದ್ಯಾವ್. ಮೀ ಮಾಜಾ ಕಾಮಾನಿ ಮಾಜಾ ಇಸ್ವಾಸ್ ದ್ಯಾವ್ಚೊ ಮನ್ವುನ್ ಸಾಂಗನಾರ್ ನವ್ವ.

19 ದೇವ್ ಯಕ್ಲಾಸ್ ಮನ್ವುನ್ ತು ಇಸ್ವಾಸ್ ಥೆವ್ಚೊಸ್. ತ್ಯ ಬರ ಫನ್ ಲಾಗಿರ್ ಸಾಹಿತ ತಸಿಸ್ ಇಸ್ವಾಸ್ ಕರುನ್ ವಾಡ್‌ತ್ಯಾತ.

20 ಬುದ್ಧಿ ನಸ್‌ಲ್ಯಾಲಾ ಕಾಮ ನಸ್‌ಲ್ಯಾಲಾ ಇಸ್ವಾಸ್ ಉಪೆಗ್ ನಸ್‌ಲ್ಯಾಲಾ ಮನ್ವುನ್ ತುಲಾ ಸಾಬಿತ್ ಕರಾಯಾ ವ್ಹಯಿ ಕ್ಯಾ?

21 ಆಮಚಾ ವಡಿಲ್ ಜಾಲ್ಯಾಲ್ಯಾ ಅಬ್ರಹಾಮಾನಿ ಆಪ್ಲಾ ಲೈಕ್ ಜಾಲ್ಯಾಲ್ಯಾ ಇಸಾಕಾಲಾ ಯಜ್ಜವೇದಿವ ದಿಲಾತವಾ ನೀಯತಿಚಾ ಮನ್ವುನ್ ತಿರ್ಮಾನ್ ಜಾಲ್ಯಾಲಾ ಇಸ್ವಾಸಾಚಾ ಕಾಮಾನಿಸ್ ನವ್ವ ಕ್ಯಾ?

22 ತ್ಯಚಾ ಇಸ್ವಾಸಾನಿ ಕಾಮ್ ಕೆಲ ಆನಿ ತ್ಯಾ ಕಾಮಾನಿಸ್ ತ್ಯಚಾ ಇಸ್ವಾಸ್ ಪುರ್ನ್ ಜಾಲ್ಲ್ಯಾ.

23 “ಅಬ್ರಹಾಮಾನಿ ದೇವಾವ ಇಸ್ವಾಸ್ ಥೆವ್ಲಾ ಆನಿ ತ್ಯಚಾ ಇಸ್ವಾಸ್ ತ್ಯಚಾ ಲೆಖ್ಯಾತ್ ನೀಯತಿಚಾ ಮನ್ವುನ್ ಮನ್‌ಲ್ಯಾಲ ಧರ್ಮಶಾಸ್ತ್ರಾಚ್ ಬೊಲ್ನ ಆಸ ಜಾಲ್ಲ್ಯಾ”. ಮನ್ವುನ್ ಅಬ್ರಹಾಮಾಲಾ ದೇವಾಚಾ ಸುಪ್ತಿ ಮನ್ವುನ್ ಹಾಕಟ್ಲಾ.

24 ಮನ್ವನ್ ಮಾನ್ಸಚಾ ಕಾಮಾನಿ ನೀಯತಿಚಾ ಮನ್ವನ್ ತಿರ್ಮಾನ್ ವ್ಹತ್ತೊ ತ್ಯ ಸುಡುನ್ ನಿಸ್‌ತ್ಯಾ ಇಸ್ವಾಸಾನಿ ನವ್ವ ಮನ್ವನ್ ಬಗ್‌ತ್ಯಾಸಾ.

25 ತೇಸ್ ತರನಿ ವೆಬಿಚಾರಿ ಜಾಲ್ಯಾಲಿ ರಾಹಾಬ್ ಗುಡಾಚಾರಿನಾ ಆಪ್‌ಲ್ಯಾಗರಾತ್ ಹಾಕ್ವುನ್ ಗಿಹುನ್, ದುಸ್ರೆ ವಾಟಿನಿ ತ್ಯನಾ ಲಾವುನ್ ದಿಲ್ಯಾಲ್ಯಾ ಕಾಮಾನಿಸ್ ನೀಯತಿಚಿ ಮನ್ವನ್ ಗೆತಲ್ಯಾಲಿ ನವ್ವ ಕ್ಯಾ?

26 ಆತ್ಮನಸಾಲ್ಯಾಲ ಧಡ್ ಮೆಲ್ಯಾಲಸ್ ತಸಸ್ ಕಾಮಲಾ ನಸಾಲ್ಯಾಲಾ ಇಸ್ವಾಸ್ ಮೆಲ್ಯಾಲಾ ಜಾಲ್ಯಾ.

3

ಜೀಬ್

1 ಆಮ್ಚಾ ಬನ್ವಿ ಬಾವ್ತಾನು, ಸಿಕಿವ್ವಾರ್ಚ್ಯಾ ಆಮಾನಾ ತರಾಸಾಚಾ ನ್ಯಾಯಿ ತಿರ್ಪ್ ವ್ಹನಾರ್ ಮನ್ವನ್ ಸಮಜುನ್ ಖುಬ್ ಜಾನ್ ಸಿಕಿವ್ವಾರ್ ವ್ಹವುನಕೊಸಾ.

2 ಖುಬ್ ಗುಸ್ಪಿತ್ಲಿ ಆಮಿ ಸಗ್ಳು ಚುಕ್ವಾರ ಜಾಲ್ಯಾವ್. ಯೊಕ್ ಸಬ್ದಾಲಾ ಚುಕ್ವಾನಾಹಿತ ತ್ಯೊ ಸಗ್ಳ್ಯಾ ಚಾಂಗಲ್ಯಾ ಗುನಾಚಾ ಆಪ್ಲ ಸಗ್ಳು ಶರೀರ್ ಆಪ್‌ಲ್ಯಾ ತಾಬ್ಯಾತ್ ದರ್ನಾರಾ ಜಾಲ್ಯಾ.

3 ವಾರು ಆಮ್ಚಾ ಮನಾಸಾರ ಚಾಲಾಯಾಸಾಟಿ ತ್ಯಂಚಾ ತೊಂಡಾಲಾ ಲಗಾಮ್ ಗ್ಯಾಲ್ತಾವ್. ತವಾ ತ್ಯಂಚ್ ಶರಿರ್ ಸಗ್ಳು ಆಮಾನಾ ವ್ಹಯಿತಿಕ್ ಪರ್ತಾಯಾ ವ್ಹತ.

4 ವ್ಹಡ್ಯಾ ಸಾಯಿತ್ ಬಗಾ. ತ್ಯಾ ಖುಬ್ ಮೊಟ್ಯಾ ಆಸಾಲ್ಯಾತರಿ ಮೊಟ್ಯಾ ವಾರ್ಚ್ಯಾನಿ ಹಲ್‌ತ್ಯಾತಾ. ಫನ್ ವ್ಹಡಿ ಚಾಲಿವ್ವಾರಾ ಖುಬ್ ಬಾರಿಕ್ ಚುಕಾನಿನಿ ಆಪಲ್ಯಾಲಾ ಜಾಯಾ ವ್ಹಯಿ ತಿಕ್ ವ್ಹಡಿ ಪರತೊ.

5 ತಸಸ್ ಜೀಬ್ ಸಾಯಿತ್ ಬಾರಿಕ್ ಜಾಲಿತರಿ ಮೊಟ್ಯಾ ಕಾಮಾಚೆ ಗುಸ್ಪಿತ್ ಬಡಾಯಿ ಸಾಂಗ್ತಿ. ಇಸಾತ್ಯಾಚ್ ಬಾರಿಕ್ ಕಿಟಾಳ್ ಮೊಟಿ ರಾನ್ ಜಾಳ್ತ.

6 ಜೀಬ್ ಸಾಯಿತ್ ಇಸ್ತುಸ್. ಜೀಬ್ ನೀಯತ್ ನಸಾಲ್ಯಾಲ್ಯಾಂಚೆ ಇರುದ್ ಹಾ ಆಮ್ಚಾ ಶರೀರಾಚಾ ಬಾಗಾತ್ಲಿ ಮದ್ಯೆ ಧೆವ್ಲೆ. ತೀ ಶರೀರ್

ಸಗೃಹಾಳ್ ಕರ್ತಿ. ಆಪ್ತುನ್ ನರಕ್ ಮಂತ್ಯಾಲಾ ಇಸ್ತು ಲಾವುನ್ ಗಿಹಿತ್ ಸಗ್ಳ್ಯಾ ಜಲ್ಮಾಲಾ ಇಸ್ತು ಲ್ಯಾವ್ತಿ.

7 ಸಗ್ಳೆ ತರಚಿ ಭನಾವಾರ, ಪಾಕ್, ಪೊಟಾನಿ ಭಾನಾರ ಕಿಡಮುಂಗ್, ಪಾನ್ಯಾತಲ್ಯಾ ಭನಾವರಾನಾ ಮಾನ್ಸ ತಾಬ್ಯಾತ್ ಆನ್ತಿಲ ಆನಿ ಆನ್‌ಲ್ಯಾತ್.

8 ಫನ್ ಜಿಬ್ ಕುನಿ ಆಪ್‌ಲ್ಯಾ ತಾಬ್ಯಾತ್ ಆನ್ತಿ ನಾಹಿ. ತೀ ಗಪ್ ರಾಹಿ ನಸಲ್ಯಾಲಿ ಬುರ್ಸಿ ಭಾಲೆ. ತಿ ಮರ್ನಾಚಾ ಇಸಾನಿ ಬರ್ಲೆ.

9 ತೇಸ್ ಜಿಬಿನಿ ಆಮ್ಚಾ ಪ್ರಭುಲಾ ಆನಿ ಬಾ ದೇವಾಲಾ ಸ್ತುತಿ ಕರ್ತಾವ್ ಮನ್ವುನ್ ದೇವಾಚಾ ರುಪಾಚೆಗತ್ ಕೆಲ್ಯಾಲ್ಯಾ ಮಾನ್ಸಾನಾ ಆಮಿ ಸರಾಪಾವ್.

10 ತ್ಯಾಸ್ ತೊಂಡಾನಿ ಸ್ತುತಿ ಆನಿ ಸರಾಪ ದುನಿಬಿ ಯತ್ಯಾತ್! ಮಾಜಾ ಬನ್ದಿ ಬಾವ್ತಾನು, ಆಸ ವ್ಹವುನಾಹಿ.

11 ಗೊಡ್ ಆನಿ ಕಡು ಪಾನಿ ಯಕಾಸ್ ಜರ್ಯಾತ್ನಿ ಯತ ಕ್ಯಾ?

12 ಮಾಜಾ ಬನ್ದಿ ಬಾವ್ತಾನು, ಅಂಜುರಾಚ್ ಜಾಡ್ ವಲಿವ್ ಫಳ್ ನಾಹಿತ ದರಾಕ್ಷಿಸೆ ಯೆಲಿಲಾ ಅಂಜುರಾಚ್ ಫಳ್ ಲಾಗ್ ತಕ್ಯಾ? ನಾಹಿ! ತಸಸ್ ಖಾರಾಟ್ ಪಾನ್ಯಾಚಾ ಜರ್ಯಾತ್ನಿ ಗೊಡ್ ಪಾನಿ ಯೆಯಿತ್ನಾಹಿ.

ವೈಲ ಗಿನ್ಯಾನ್

13 ತುಮ್ಮಿಪ ಜ್ಞಾನಿ, ನಾಹಿತ ಶಾನ ಕೋನ್? ತಸ್ಲಾ ಚಾಂಗ್ಲೆ ಚಾಲ್ತುಕಿನಿ ಗಿನ್ಯಾನಾಚ್ ಲಕ್ಷೆನ್ ಭಾಲ್ಯಾಲ ಥಂಡ್ವನ್, ಸಮಾದಾನಾಚಾ ಕಾಮಾನಿ ತ್ಯ ದಾವುನಿ.

14 ಫನ್ ತುಮ್ಮಾ ಮನಾತ್ ಸ್ವಾರ್ತಫನ್ ಆನಿ ಕಡು ಇಸ್ ಆಸಲ್ತುತುಮಿ ಖರ್ಯಾಚೆ ಆಡ್ಲ ಲಬಾಡ್ ಬುಲುನ್ ವವ್ಯಾಳುನ್ ಗಿಹುನಕೊಸಾ.

15 ತ್ಯ ವೈನಿ ಆಲ್ಯಾಲ ಗಿನ್ಯಾನ್ ನವ್ವ್ ತ್ಯ ದರ್ತಿಲಾ ಸಂಬದ್ ಆಸ್‌ಲ್ಯಾಲ, ತ್ಯ ಆತ್ಮಿಕ್ ನವ್ವ್ ತ್ಯ ಬುಧಾನ್ ಸಂಬಂದ್ ಆಸ್‌ಲ್ಯಾಲ.

16 ಖೊಟಿಪನ್, ಆನಿ ಸ್ವಾರ್ತಫನ್ ಕುರ ರಾಥ ಧಿತ ಗೊಂದೊಳ್ ಆನಿ ಸರ್ವೆತರಚ್ ನಾಲಾಯಿಕ್ ಫನ್ ರಾಥ.

17 ಫನ್ ವೈನಿ ಆಲ್ಯಾಲ ಗಿನ್ಯಾನ್ ಆಂದಿ ನಿರ್ಮಳ್ ಆಸ್‌ಲ್ಯಾಲ ತ್ಯಾ ನಂತರ , ಥಂಡ್ವನಾಚ್, ಸಮಾದಾನಾಚ್, ಐಕ್ಯಾಲ್ ವ್ಹವುನ್, ಕರ್ನಾ

ಆನಿ ಭಾಂಗಲ್ಯಾ ಫಳಾನಿ ಬರ್ಲ್ಯಾಲ, ಬೆದ್ ಬಾವ್ ನಸಲ್ಯಾಲ, ಕಪಟ್ ನಸಲ್ಯಾಲ ಭಾಲ್ಯಾ

18 ಥಂಡ್ವನ್ ಉತ್ಪತ್ತಿ ಕರ್ತ್ಯಾಲ ಥಂಡ್ವನ್ ಮಂತ್ಯಾಲ ಬೀ ಪಿರುನ್ ನಿಯತ್ ಮಂತ್ಯಾಲ ಪಿಕ್ ಕ್ಯಾಪ್ಪಾರ್.

4

ದುನೆಚ್ ಸುಪ್ತಿಫನ್

1 ತುಮ್ಮಿಪ ಕಳಿ ಬಾಂಡ್ತ್ ಕುಟ್ಟಿ ಯತ್ಯಾತ? ತುಮ್ಮಾ ಶರೀರಾನಿ ದಾವ್ತ್ಯಾಲ ಲಡತ್ಯಾಲ ಮನಾಚಾ ಬಾವ್ವಾನಿ ಬುರ್ಶೆ ಆಶೆನಿ ಯತ ನವ್ತ್?

2 ತುಮ್ಮಾ ಮನಾತ್ ಆಸ್ಲ್ಯಾಲ ತುಮಾನಾ ಗಾವ್ಲನಾಹಿ. ತುಮಿ ಖುನ್ ಕೆಲಾಸಾತರಿ, ಖೊಟಪನ್ ಕೆಲಸಾತರಿ ಮನಾತ್ ಆಸ್ಲ್ಯಾಲ ಮಿಳ್ವಾಯಾ ಜಾಲ್ತನಾಹಿ; ತುಮಿ ಭೊಂಬ್ತಾಸಾ, ಕಳಿ ಕರ್ತಾಸಾ. ಫನ್ ತುಮಿ ದೇವಾಪ ಮಾಗತ್ವಾಹಿ ಮನ್ವುನ್ ತುಮಾನಾ ಕಾಯ್ ಗಾವತ್ವಾಹಿ.

3 ತುಮಿ ಮಾಗ್ಲಸಾತರಿ ಮಾಗ್ಲ್ಯಾಲ ತುಮ್ಮಾ ಸುಕಾಸಾಟಿ ವಾಯಿಟ್ ತರನಿ ವಾಪರ್ಲ್ಯಾಲ್ಯಾನಿ ಮಾಗ್ತಾಸಾ ಮನ್ವುನ್ ತುಮಾನಾ ಮಿಳತ್ವಾಹಿ.

4 ವ್ಯಭಿಚಾರಿನು, ಹೆ ದುನೆಚ್ ಸುಪ್ತಿಫನ್ ದೇವಾಲಾ ಆಡ್ಲ ಮನ್ವುನ್ ತುಮಾನಾ ರಾವ ನಾಹಿಕ್ಯಾ? ಮನ್ವುನ್ ದುನೆಚ್ ಸುಪ್ತಿ ವ್ಹಯಾವ್ಹಯಿ ಮಂತ್ಯಾಲಾ ಆಪ್ಲ್ಯಾಲಾ ದೇವಾಚಾ ವಾದಿ ಕರುನ್ಗತೊ.

5 ದೇವಾನಿ ಆಮ್ಮಿಪ ಥೆವ್ಲ್ಯಾಲ ಪವಿತ್ರಾತ್ಮ ಮರೆದಿನಿ ಆಸೆನಿ ಆಮ್ಮಿಸಾಟಿ ಮನಾನಿ ದರ್ಮಶಾಸ್ತಾರ್ ನಿಸ್ತ ಬೊಲ್ವ ತ್ಯವ್ಡಸ್ ಮನ್ವುನ್ ತುಮಿ ಸಮಜುನ್ ಗೆತಾಸಾಕ್ಯಾ?

6 ತ್ಯೊ ಆಮಾನಾ ಖುಬ್ ಕ್ರಪಾ ದೆನಾರ್. ಮನ್ವುನ್, ದೇವ್ ಬಡಾಯಿಚಾನಾ ವಾದಿಜಾಲ್ಯಾ ಗರಿಬಾನಾ ಕರ್ನಾದ್ಯಾವ್ವಾರ್ ಮನ್ವುನ್ ಧರ್ಮಶಾಸ್ತಾರ್ ಸಾಂಗ್ತ.

7 ಆಸ ಆಸ್ತಾನಾ ತುಮಿ ದೇವಾಸಂಗ ರಾಹುನ್ ಸೈತಾನಾಲಾ ಆಡ್ಯಾವಾ, ತವಾ ತ್ಯೊ ತುಮಾನಾ ಸುಡುನ್ ಪಳುನ್ ಜಾಯಿಲ್.

8 ತುಮಿ ದೇವಾಪ ಯವಾ, ತವಾ ತ್ಯೊ ತುಮ್ಮಿಪ ಯಯಿಲ್. ಪಾಪಿನು, ತುಮ್‌ಚ್ ಹಾತ್ ದುವ್ವಾ; ಕಪ್ಪಿನು ತಿಮ್ಮಿ ಮನ ನಿರ್ಮಳ್ಳರಾ.

9 ರಡಾ, ಲೊಳಾ, ದುಖಗಾಳಾ; ತುಮ್‌ಚ್ ಹಾಸ್ಸ ಸುಡುನ್ ಪ್ರಭುಚೆ ಕ್ರಪೆಸಾಟಿ ಲುಳುನ್ ಮಾಗಾ. ತುಮ್‌ಚ್ ಲೊಕಾತ್ಲಾ ಸಂತೊಶ್ ಸುಡುನ್ ಪ್ರಬುಲಾ ಗಿಹ್ಯಾ ಯತ್ನ ಕರಾ.

10 ಪ್ರಭುಚೆ ಮೊರ್ಡ್ ತುಮಿ ಬಾರಿಕ್ ವ್ಹವಾ; ತವಾ ತ್ಯೊ ತುಮಾನಾ ವರ್ ಉಚ್‌ಲ್ತಾರ್.

ಯಕಾ ಬಾವ್ವಾಚಾ ನ್ಯಾಯಿ ಕರಾಚಾ

11 ಬನ್ವಿ ಬಾವ್ವಾನು ಯಕಾಮಕಾಚಿ ನಿಂದಾ ಕರು ನಕೊಸಾ. ಕಚಾನಿತರಿ ಆಪ್‌ಲ್ಯಾ ಬಾವ್ವಾಚಿ ನಿಂದಾ ಕಿಲಿತ ನಾಹಿತ ಆಪ್‌ಲ್ಯಾ ಬಾವ್ವಾಚೆ ಗುಸ್ತಿತ್ ನ್ಯಾಯಿ ನಿವಡ್ಲಾತ ತ್ಯನಿ ದರ್ಮಶಾಸ್ತ್ರಾರಾಚಿ ನಿಂದಾ ಕರುನ್ ತ್ಯಚೆ ಗುಸ್ತಿತ್ ತಿರ್ಮಾನ್ ಕೆಲ್ಯಾವ ತು ನ್ಯಾಯಿನಿವಡ್ಲಾರಾ ವ್ಹನಾರ್ ನಾಹಿತ ತ್ಯ ಪ್ಯಾಳ್‌ತ್ಯಾಲಾ ನವ್ವಸ್.

12 ದರ್ಮ ಶಾಸ್ತ್ರಾರ್ ದಿಲ್ಯಾಲಾ ನ್ಯಾಯಾದಿಪತಿ ಯೊಕುಸ್; ತ್ಯೊಸ್ ಉರಿವ್ತಾರಾ ಆನಿ ನಾಸ್ ಕರ್ನಾರಾ. ಆಸ ಆಸ್ತಾನಾ ತುಜಾ ಸೆಜಾರ್‌ಚೆ ಗುಸ್ತಿತ್ ನ್ಯಾಯಿ ನಿವಡಾಯಾ ತು ಕೊನ್?

ಗಮೆಂಡಿಚೆ ಆಡ್ವಿ ಹುಶಾರ್ಕಿ

13 ಆಜ್ಞೆ ನಾಹಿತ ಸಕಾಳ್ ಆಮಿ ಆಸ್ಲೆ ಪೆರತ್ ಜಾವುನ್ ತಿಥ್ ಎಕ್ ವರಿಸ್ ರಾಹುನ್ ಯಾಪಾರ್ ಕರುನ್ ಲಾಬಾ ಗೆಥಾವ್ ಮಂಥ್ಯಾಲ್ಯಾನು ಐಕಾ. 14 ಸಕಾಳ್ ಕ್ಯಾ ವ್ಹನಾರ್ ಮನ್ವುನ್ ತುಮಾನಾ ರಾವ ನಾಹಿ. ತುಮ್‌ಚ್ ಜಿವ್ವಾ ಕಸ್ಲಾ? ತುಮಿ ಥೊಡಾ ಯೊಳ್ ದಿಸುನ್ ಮಂಗ್ ದಿಸ ನಸ್ತಾರೆ ವಾಪ ಸಾರಿ ಹಾಸಾ.

15 ಮನ್ವುನ್ ತುಮಿ ತೆ ಸಬಾತ್ ಸುಡುನ್ ದೆವಾಚ್ ಮನ್ ಆಸ್ಲತ ಆಮಿ ಜಗುನ್ ಹ್ಯಾ ಆನಿ ತ್ಯಕಾಮ್ ಕರ್ತಾವ್ ಮನ್ವುನ್ ಸಾಂಗಾವ್ವಯಿಸಾ.

16 ಖರ ತುಮಿ ತುಮ್ಮೆ ಬಡಾಯಿನಿ ತುಮ್ಮೆ ಗುಸ್ತಿತ್ ವವ್ಯಾಳುನ್ ಗೆಥಾಸಾ. ತಸ್ಲ ವವ್ಯಾಳ್ಳ ಬುರ್ಸ ಜಾಲ್ಯಾ

17 ಮನ್ವುನ್ ಚಾಂಗ್ಲ ಕರಾಯಾ ವ್ಹಯಿ ಮನ್ವುನ್ ರಾವ ಆಸುನ್ ತ್ಯ ಕರಾಚೆ ಆಂದಿ ರಾಥ್ಯಾಲಾ ಪಾಪ್ ಕರ್ತ್ಯಾಲಾ ಜಾಲ್ಯಾ

5

ಸಾವ್ವಾರಾನಾ ಹುಶಾರ್ಕಿ

1 ಸಾವ್ವಾರಾನು ಐಕಾ, ತುಮಾನಾ ಯತ್ಯಾಲ್ಯಾ ತರಾಸಾಸಾಟಿ ದುಖಿಗಾಳಾ, ಲೊಳಾ.

2 ತುಮಾಚ್ ಧನ್ ದವ್ಲತ್ ನಾಸ್ ಜಾಲ್ಯಾ, ತುಮ್ಮಾ ಕಪ್‌ಡ್ಯಾನಾ ಕಿರ್ವಿ ಲಾಗ್ಲೆ.

3 ತುಮ್ಮಾ ಸೊನ್ಯಾ ಚಾಂದಿಲಾ ಟ್ಯಾಮ್ಪು ಲಾಗ್‌ಲ್ಯಾ, ತ್ಯಂಚ್ ಟ್ಯಾಮ್ಪು ತುಮ್ಮೆ ಆಡ್ವ ಸಾಕ್ಷಿ ವ್ಹಪುನ್, ಇಸತ್ಯಾಚೆಗತ್ ತುಮಾಚ್ ಮಾಸ್ ಖಾನಾರ್. ಸರ್ತ್ಯಾ ಯಳಾಸಾಟಿ ತುಮ್ಮಿ ಧನ್ ದವ್ಲತ್ ಕಮವುನ್ ಥೆವ್‌ಲ್ಯಾಸಾ.

4 ಐಕಾ ತುಮ್ಮಾ ಸೆತಾತ್ಲ ಪೀಕ್ ಕ್ಯಾಪ್‌ಲ್ಯಾಲ್ಯಾಂಚಿ ಕುಲ್ ದಿಯಾಚೆ ಆಂದಿ ಫೆಸಿವ್‌ಲ್ಯಾಸಾ. ತೆ ಕುಲಿಫಾ ಆವಾಜ್ ಆನಿ ಪಿಕ್ ಕ್ಯಾಪ್‌ಲ್ಯಾಲ್ಯಾಂಚಾ ಆವಾಜ್ ಸ್ವರ್ಗಾತಲ್ಯಾ ಸೈನ್ಯಾಂಚಾ ಮೊಟ್ಯಾ ದೆವಾಚಾ ಕಾನಾವ ಪೊಚ್‌ಲ್ಯಾ.

5 ದರ್ಥಿವ ತುಮಿ ಸುಕಿ ವ್ಹಪುನ್ ತುಮ್ಮಿ ಮನ ಫಾರಿಕ್ ಕರುನ್ ಜಗ್ಲಾಸಾ; ಬಲಿ ದಿಯಾಚಾ ದಿಸಾಸಾಟಿ ಖಾಪುನ್ ಪಿವುನ್ ತಯಾರ್ ಕೆಲ್ಯಾ ಶಾರ್ಕಿ ತುಮ್ಮಿ ಮನ ಮಾತಿವ್‌ಲ್ಯಾಸಾ.

6 ತುಮಿ ಚುಕ್ ನಸ್‌ಲ್ಯಾಲ್ಯಾಲಾ ದೊಶ್ ವಾವುನ್ ಮಾರುನ್ ಟ್ಯಾಕ್ಲಾಸಾ; ಫನ್ ತ್ಯೊತರಿ ತುಮಾನಾ ಇರೊದ್ ಕರಿತ್ಸಾಹಿ.

ಥಂಡ್ವನ್ ಆನಿ ಮಾಗ್ನ

7 ಬನ್ವಿ ಬಾವ್ತಾನು ಪ್ರಭು ಯಯಿಸ್ವರ್ಯಾತ್ ಥಂಡ್ವನಾನಿ ರಾವ್ತಾ ಸೆತ್ಕರ್ಯಾಲಾ ಬಗಾ ತ್ಯೊ ಆಪ್‌ಲ್ಯಾ ಸೆತಾತ್‌ಲ್ಯಾ ಕಿಮ್ಮಿಚಾ ಪಿಕಾಸಾಟಿ ಮಾಗ್‌ಲ್ಯಾ ಮೊರ್ಲ್ಯಾ ಪಾವ್ತಾಚಿ ವಾಟ್ಪಿಗಿತ್ ಥಂಡ್ವನಾನಿ ರಾಥೊ.

8 ತುಮಿ ಥಂಡ್ವನಾನಿ ರಾವ್ತಾ ತುಮ್ಮಿ ಮನ ಘಟ್ಕರಾ; ಕಾ ಮಂಜೆ ಪ್ರಭುಚ್ ಯನ ಜವಳ್ ಆಲ.

9 ಬನ್ನಿ ಬಾವ್ವಾನು ತುಮಿ ಯಕಾಮಕಾವ ಚುಕ್ ವಾವು ನಕೊಸಾ; ಹೈನಿ ತುಮ್ಚಾ ನ್ಯಾಯಿ ಇಚಾರ್ ವ್ಹಯಿತ್ ನಾಹಿ. ನ್ಯಾಯಿ ನಿವಡ್ಕಾರಾ ದಾರಾ ಮೊರ್ಲ್ಹಾ ಉಬಾ ಹಾ.

10 ಬನ್ನಿ ಬಾವ್ವಾನು ತರಾಸ್ ಸಮಾದಾನಾನಿ ಸುಸುವುನ್ ಗಿಹ್ಯಾಚೆ ಗುಸ್ವಿತ್ ದೆವಾಚೆ ಗುಸ್ವಿತ್ ಬೊಲ್ಯಾಲ್ಯಾ ಪ್ರವಾದಿನಾ ಉದಾಹರನ್ ಧಿವುನ್ ಗೆವ್ವಾ.

11 ದುಕ್ ಸುಸುವುನ್ ಗಿಹಿಲ್ ತ್ಯೊ ಬರಾ ಹೈ ಲಕ್ಷೆತ್ ರಾಹುನಿ ತುಮಿ ಯೊಬಾಚಾ ಸಮಾದಾನಾಚೆ ಗುಸ್ವಿತ್ ಐಕ್‌ಲ್ಯಾಸಾ ಪ್ರಭುನಿ ತ್ಯಲಾ ಸರ್ತ್ಯಾ ಯಕಾಲಾ ಕೆಲ್ಯಾಲ ಬಗುನ್ ಪ್ರಭು ಖುಬ್ ಕರ್ನಾ ಆಸ್ತಾರಾ ಆನಿ ದಯಾಳು ಜಾಲ್ಯಾ ಮನ್ವುನ್ ರಾವಾ ಹಾ.

12 ಮಾಜಾ ಬನ್ನಿ ಬಾವ್ವಾನು, ಆಂದಿ ಕರುನ್ ಶಪತ್ ಗಾಲು ಕೊಸಾ ಆಬ್ಯಾವ ವ್ಹವುನಿ ದರ್ಥಿವ ವ್ಹವುನಿ ಆನಿ ಕಶಾವಸ್ ಶಪ್ಪತ್ ಗಾಲು ನಕೊಸಾ ವ್ಹಯ್ ಮನ್ವುನ್ ಸಾಂಗಾಚೆ ಜಾಲತ ವ್ಹಯ್ ಮನ್ವಾ ನಾಹಿ ಮನ್ವುನ್ ಜಾಲತ ನಾಹಿ ಮನ್ವಾ ಆಸ ಜಾಲ್ಯಾವ ತುಮಿ ನ್ಯಾಯಿ ಇಚಾರಾತ್ ಗಾವ್ನಾರ್ ನಾಹಿಸಾ.

13 ತುಮ್ಮಿಪ ಕೊನ್ತರಿ ತರಾಸ್ ಖಾತ್ಯಾಲಾ ಆಸ್ಲಾತ ಮಾಗ್ನ ಕರುನಿ ತುಮ್ಮಾತ್ ಕೊನ್ತರಿ ಸಂತೊಶ್ ವ್ಹನಾರಾ ಆಸ್ಲಾತ ತ್ಯೊ ದೇವಾಲಾ ಸ್ತುತಿ ಗೀತ್ ಸಾಂಗುನಿ.

14 ತುಮ್ಮಾತ್ ಕುನಾಲಾ ಬರ ನಸ್ಲತ, ತ್ಯೊ ಸಭೆಚಾ ಜಾಂತ್ಯಾನಾ ಹಾಕ್ಪುನ್ ಮಾಗ್ನ ಕರಾಯಾ ಇನಂತಿ ಕರುನಿ. ತ್ಯೊ ಪ್ರಭುಚಾ ನಾವಾನಿ ತ್ಯಲಾ ತ್ಯಾಲ್ ಲಾವುನ್ ತ್ಯಚಿಸಾಟಿ ದೇವಾಪ ಮಾಗ್ನ ಕರುನಿ.

15 ಇಸ್ವಾಸಾನಿ ಕೆಲ್ಯಾಲ ಮಾಗ್ನ ರೊಗಿಲಾ ಬರ ಕರ್ತ ಆನಿ ಪ್ರಭು ತ್ಯಲಾ ಉರಿವ್ನಾರ್ ತ್ಯನಿ ಪಾಪ್ ಕೆಲ ಆಸ್ಲತ ಮಾಪ್ಕರ್ನಾರ್

16 ಆಸ ಆಸ್ಥಾನಾ ತುಮಿ ಬರಿ ವ್ಹಯಾಲಾ ತುಮ್ಮಿ ಪಾಪ ಯಕಾಮಕಾಪ ಸಾಂಗುನ್ ಯಕಾಮಕಾಸಾಟಿ ಮಾಗ್ನ ಕರಾ ನಿಯೆತಿಚಾಚೆ ಮನಾನಿ ಕೆಲ್ಯಾಲ ಮಾಗ್ನ ಬಳ್ ಆಸ್‌ಲ್ಯಾಲ ಆಸ್ಲ.

17 ಎಲಿಯಾ ಆಮ್ಚಿ ಶಾರ್ಕಾ ಯೊಕ್ ಮಾನುಸ್ ಜಾಲ್ಲ್ಯಾ ತ್ಯನಿ ಪಾವುಸ್

ಯವುನಾಹಿ ಮನ್ವುನ್ ಖರೈ ಮಾನಾನಿ ಮಾಗ್ನ ಕೆಲ ತಿನ್ ವರ್ಸ ಸಾ ಮೈನ್ದ ದರ್ಥಿವಿವ ಪಾವುಸ್ ಲಾಗ್ಲಾ ನಾಹಿ.

18 ಪರ್ತುನ್ ತ್ಯನಿ ಮಾಗ್ನ ಕೆಲತವಾ ಅಬ್ಬಾತ್ತ್ ಪಾವುಸ್ ಲಾಗ್ಲಾ ಆನಿ ದರ್ಥಿನಿ ಪರ್ತುನ್ ಪಿಕ್ ದಿಲ.

19 ಮಾಜಾ ಬನ್ದಿ ಬಾವ್ವಾನು ತುಮ್ಮಾತ್ ಕೊನ್ ತರಿ ಖರಾ ಮಾರ್ಗ ಸುಡುನ್ ಫಾಲ್ಯಾವ ದಿಸರ್ಯಾನಿ ತ್ಯಲಾ ನಿಟ್ ವಾಟವ ಆನ್‌ಲ್ಯಾವ

20 ಯಕಾ ಪಾಪಿಲಾ ಬುರ್ಸೆ ವಾಟವ್ಚಿ ಫುಕವುನ್ ಫಾಂಗ್ಲ ಸಾಂಗುನ್ ತ್ಯಚ್ ಆತ್ಮ ಮರ್ಯಾತ್ಚಿ ಚುಕ್ವುನ್ ಖುಬ್ ಪಾಪ ಮಾಪ್ ಕರಾಯಾ ಲ್ಯಾವಲ್ಯಾಲಾ ಮನ್ವುನ್ ಸಮಜುನ್ ಗಿಹುನಿ.

ದೆವಾಚಿ ಖರಿ ಕಬರ್
The New Testament in the Gowli language of India,
Devanagari script. ದೆವಾಚಿ ಖರಿ ಕಬರ್ (Bible)

copyright © 2023 The Word for the World International and Gowly Marathi Translation Samti, Karnataka

Language: (Gowli)

Contributor: The Word for the World International

ದೆವಾಚಿ ಖರಿ ಕಬರ್
ನವಾ ಕರಾರ್, 2023

The New Testament in Gowli Marathi Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

c4461ecc-9ab5-5edc-b62d-034ac186b922